

U ovom broju, između ostalog, čitajte:

- **Održana sjednica Upravnog odbora Udruženja poslodavaca u FBiH**
- **Udruženje poslodavaca u FBiH: Hitna potreba za obnovom transportne infrastrukture**
- **Održan sastanak sa privrednicima sa područja pogođenim poplavama**
- **Primjena ZUT-a i Prva trgovinska konferencija teme sastanka ministra Hasičevića i poslodavaca**
- **Rukovodstvo UPFBiH u posjeti kompanijama sa područja Goražda**
- **Udruženje poslodavaca KS poziva Vladu i institucije vlasti KS da intenziviraju rad na usaglašenim inicijativama i zaključcima za poboljšanje poslovnog ambijenta**



Održana sjednica Upravnog odbora Udruženja poslodavaca u FBiH



Na sjednici Upravnog odbora Udruženja poslodavaca u FBiH, održanoj 22. oktobra 2024. godine, raspravljalo se o nekoliko veoma bitnih inicijativa. Najprije se razmatrala inicijativa Sindikata metalaca FBiH za pokretanje pregovora o izmjenama i dopunama granskog kolektivnog ugovora u kojem se između ostalog traži povećanje satnice te je zaključeno da se otvaranje ovog procesa veže za fiskalne zakone.

Raspravljalo se i o inicijativi za izmjenu i dopunu Pravilnika o primjeni Zakona o porezu na dobit, odnosno problema dvostrukog oporezivanja digitalnog oglašavanja putem globalnih platformi poput Google-a i Facebook-a. Naime, u posljednje vrijeme u slučaju digitalnog oglašavanja putem gore pomenutih platformi, Porezna uprava FBiH oporezuje privrednike u FBiH porezom po odbitku, iako je taj porez plaćen u državi nerezidenta, odnosno u Irskoj, čime se ne primjenjuje Međunarodni ugovor o izbjegavanju dvostrukog oporezivanja. Stručna služba UPFBiH je uputila dopis i inicijativu za izmjenu Pravilnika Ministarstvu finansija FBiH, te zatražila hitno djelovanje po ovom pitanju.

Na sjednici se također raspravljalo i o inicijativi za dostavljanje Odluke Ustavnog suda nadležnim institucijama kojom se utvrđuje da određene odredbe Zakona o komunalnim taksama nisu u skladu sa Ustavom BiH, a koje se odnose na komunalnu taksu za istaknutu firmu. U Odluci je naglašeno da "isticanje firme nije u vezi s bilo kakvom protuuslugom koju pruža država/javna vlast pa da bi se moglo smatrati taksom, niti se može dovesti u vezu s ostvarenim prihodom pa da bi se moglo smatrati porezom. Poslovni subjekt za isticanje firme ne dobiva nikakvu uslugu od bilo kojeg državnog organa, već samo ispunjava zakonom

propisanu obavezu tako što svoju

firmu čini vidljivom za javnost, dakle obavezu koju ne može izbjeći". S obzirom da su odluke Ustavnog suda konačne i obavezujuće, Upravni odbor je podržao aktivnosti UPFBiH da se pokrene inicijativa za hitne izmjene kantonalnih i općinskih propisa u Federaciji BiH, kojima će se staviti van snage odredbe o utvrđivanju i naplati komunalne takse za istaknutu firmu, a sve u skladu sa Odlukom Ustavnog suda BiH. Također je zaključeno da će UPFBiH kroz medije obavijestiti i javnost o nesprovođenju odluka Ustavnog suda.

Članovi Upravnog odbora UPFBiH također su podržali inicijativu kompanije Hering za izmjenu Zakona o bankama FBiH u cilju povećanja stope izloženosti bez kolaterala ili njenog potpunog ukidanja te inicijativu kojom bi se uvela zadužnica kao instrument osiguranja novčanih tražbina po uzoru na Republiku Hrvatsku, kako bi se olakšalo poslovanje domaćih poslovnih subjekata.

U nastavku sjednice, direktor UPFBiH Mario Nenadić obavijestio je članove o obilasku kompanija sa područja stradala u nedavnim poplavama i susreta s privrednicima s ciljem sagledavanja stanja i davanja određenih prijedloga i inicijativa Udruženja prema nadležnim institucijama vlasti. Naglašeno je da privrednici puno ulažu na spašavanju gotovih proizvoda koji su bili lagerovani za isporuku na dan nepogode kao i spašavanje dijela sirovina za proizvodnju te da uglavnom samostalno osiguravaju putnu i drugu infrastrukturu do svojih objekata ili poslovnih pogona kao i da uglavnom samostalno sa svojim radnicima rade na raščišćavanju svojih pogona, mašina i opreme za rad. Među najvećim problemima privrednika su i individualne štete po život, zdravlje i imovinu njihovih radnika jer je dio radnika ostao bez kuća i uvjeta za život, pa time i za rad. Također je istaknuto da u pojedinim općinama lokalne vlasti rade određene popise šteta, međutim da ovo nije jednoobrazno i sistemsko rješenje te da je trenutno najveći izazov ponovno pokrenuti proizvodnju s ključnim ciljem provjere stanja nužne zamjene pojedinih dijelova pogona i drugo. Za ovu aktivnost potrebno je prije svega vrijeme neophodno za sušenje motora, hardverskih i softverskih elemenata, CNC mašina, kancelarija i drugo. UPFBiH je pripremio prijedlog mjera za rješavanje i sanaciju posljedica poplava po privredne subjekte koje će uputiti Vladi FBiH, a Upravni odbor je usvojio ovu inicijativu.

Direktor UPFBiH je također obavijestio članove o planiranim aktivnostima za održavanje dvije konferencije, o trgovini i poslovna konferencija o pregledu aktivnosti i prioritetima za naredni period, a koje će se održati u saradnji sa nadležnim institucijama. Upravni odbor je dao podršku ovoj aktivnosti.

Pod tekućim pitanjima razmatrana je inicijativa o izmjeni propisa koji tretiraju "Gastro odjel",

odnosno Pravilnika o razvrstavanju i minimalnim uslovima ugostiteljskih objekata iz skupine restorani, barovi, catering objekti i objekti jednostavnih usluga. Naime, većina trgovina u sklopu svojih prostorija imaju "Gastro odjel" koji u postupku registracije nije tretiran postojećim propisima te su trgovci primorani u sferu ugostiteljstva gdje trebaju dokazivati minimalne tehničke uslove za početak rada kao i da se opredijele za jednu od ponuđenih opcija gdje se dodatno razvrstavaju ugostiteljski objekti u skupine. Trgovci ne spadaju ni u jednu kategoriju jer u većini slučajeva nema posebnog prostora opremljenog ugostiteljskim namještajem, odgovarajuću izolaciju od buke, zasebni toalet itd. Članovi UO su podržali inicijativu za ažuriranje ili izmjene propisa kako bi se dodatno izdefinisale i pojednostavile procedure.

Pod istom tačkom, član UO Nihad Imširović izrazio je nezadovoljstvo iznenadnim izmjenama Zakona o unutrašnjoj trgovini amandmanskim djelovanjem Vlade, koji će se danas naći na Dnevnom redu ZD PFBiH a koje se odnose na rad nedjeljom, te istakao da Radna grupa koja je radila na pripremama Zakona ne podržava ovaj amandman i izričito je protiv ovakvog usvajanja Zakona.

Zastupnički dom PFBiH usvojio više prijedloga zakona bitnih za privredu



Zastupnički dom Parlamenta Federacije Bosne i Hercegovine, na sjednici održanoj 23. oktobra 2024. godine, usvojio je Prijedlog zakona o unutrašnjoj trgovini, a koji reguliše, između ostalog, i pitanje neradne nedjelje. Zakon je usklađen s europskim propisima te ima podršku i poslodavaca i potrošača i trgovaca i njihovog sindikata, naglašavaju iz Federalnog ministarstva trgovine.

Zakon je usvojen sa 68 glasova za, dva protiv, dok je deset bilo suzdržano.

Zakon propisuje da radno vrijeme prodajnih objekata određuje trgovac u periodu od ponedjeljka do subote u ukupnom trajanju od 90 sati sedmično, te da su prodajni objekti zatvoreni nedjeljom i u dane praznika.

Iznimno, općinska odnosno gradska vijeća mogu upućivati zahtjev da njihove sredine budu izuzete od ovog pravila ako za to postoje opravdani razlozi. Konačnu odluku o eventualnom izuzeću u tim slučajevima će donositi isključivo Vlada FBiH. To je novina u odnosu na prvobitnu varijantu teksta zakona jer je u međuvremenu ugrađen amandman o navedenoj mogućnosti, iznimno, općinskim i gradskim vijećima.

Ovim zakonom dodatno se uređuju i postupanja i obaveze trgovaca, a na potpuniji način uređuju se i pitanja od značaja za potrošače, poput odobravanje popusta ili prodaja sa sniženom cijenom. Uvodi se i savremena nomenklatura, te klasifikacija oblika i načina trgovine, kao i novi instituti, a s ciljem razvoja tržišne konkurencije i ravnopravnosti trgovaca. Uređuju se i trgovačka evidencija, praćenje trgovine i tržišta, zaštita potrošača, zatim zabrana ograničenja trgovine i privremene mjere ograničenja trgovine, kao i radno vrijeme u djelatnosti trgovine. Novim zakonom uređuje se i internet prodaja imajući u vidu njeno sve veće učešće u ukupnom maloprodajnom prometu. Naime, zakonom je predviđeno da oni koji prodaju robu putem interneta imaju obavezu da se registriraju i na internet stranicama putem kojih vrše prodaju istaknu podatke o registraciji kako bi kupci mogli realizirati reklamaciju. S obzirom da se razvojem internet prodaje javljaju i određene devijacije uslijed pravno neuređenog stanja u oblasti elektronskog poslovanja i nepreciznih zakonskih rješenja, kojima je u minimalnoj mjeri ova oblast regulirana, iz razornog ministarstva navode da je bilo neophodno predvidjeti i adekvatne mehanizme kojima će se to ponašanje sankcionirati. Detaljnija pravila trgovine putem internet platformi bit će razrađena u posebnom Zakonu o e-trgovini.

Zakon sadržava i mjere zabrane nepoštenog trgovanja, kao i nadzor. Propisani su prekršaji za povredu odredaba, kao i inspekcijski nadzor nad njihovim provođenjem, te kaznene odredbe. Precizirane su i materijalno-pravne odredbe koje daju konkretna ovlaštenja za poduzimanje upravnih radnji inspektorima u postupku inspekcijskog nadzora nad primjenom odredaba ovog zakona.

Da bi zakon stupio na snagu, neophodno je da u istom tekstu bude podržan većinom glasova i u Domu naroda čija je sjednica sazvana za 31. oktobra.



Na Zastupničkom domu također je usvojen Nacrt zakona o posredovanju i zapošljavanju i socijalnoj sigurnosti nezaposlenih osoba.

Ovaj zakon nije dobio potrebnu podršku na prvoj sjednici Doma naroda Parlamenta Federacije BiH u julu ove godine i bio je vraćen na ponovno usvajanje Vladi Federacije, nakon čega je ponovno pušten u parlamentarnu proceduru.

Zakonom se unaprjeđuju modeli zapošljavanja i smanjuje stopu nezaposlenosti kroz reformu posredovanja u zapošljavanju, koja će razdvojiti aktivne od pasivnih tražilaca posla. Plan je uspostaviti posebne evidencije aktivnih i pasivnih tražilaca zaposlenja u kantonalnim službama i Federalnom zavodu za zapošljavanje. Nacrt zakona predviđa i povećanje iznosa naknade u slučaju prestanka radnog odnosa na 60 posto prosječne neto plate, novu definiciju nezaposlene osobe i jasnija pravila koja će omogućiti bolje praćenje stvarne nezaposlenosti.

Ovim zakonom nastoji se provesti dugo očekivana reforma u oblasti zapošljavanja, kako bi se zadržali mladi ljudi u BiH, stvorila kvalitetna radna mjesta i unaprijedio poslovni ambijent za mlade koji su svoje obrazovanje stekli u Bosni i Hercegovini.

Zastupnički dom Parlamenta FBiH također je usvojio i Nacrt zakona o izmjenama i dopunama Zakona o zapošljavanju stranaca.

Cilj zakona o zapošljavanju stranaca je skraćivanje procedura za izdavanje radnih dozvola stranim radnicima. Lakše procedure treba ujedno da olakšaju privrednicima da dođu do deficitarne radne snage, što se, prema procjenama, trenutno najviše odnosi na njihove potrebe u građevinskom sektoru i uslužnim djelatnostima.

Dodatna predložena izmjena dosadašnjeg federalnog zakonodavstva o zapošljavanju stranaca odnosi se na izuzimanje od procedura deficitarnih a neophodnih zanimanja, dok će spisak takvih zanimanja, na osnovu stvarnih potreba na tržištu rada, dostavljati kantonalne službe i Federalni zavod za zapošljavanje.

U radu na prijedlozima sva tri zakona učestvovali su i predstavnici Udruženja poslodavaca u FBiH te su sugestije i komentari UPFBiH uglavnom ubačeni u tekstove prijedloga, čime su umnogome unapređena ova zakonska rješenja.

Usvojen Zakon o unutrašnjoj trgovini



Prijedlog zakona o unutrašnjoj trgovini je sa 55 glasova prihvatio Dom naroda Federalnog parlamenta na sjednici održanoj 31. oktobra 2024. godine, kao što ga je većinom glasova prihvatio protekle sedmice na sjednici i Zastupnički dom.

U tekstu je definisano da će zakon stupiti na snagu osmog dana po objavi u Službenim novinama Federacije BiH.

U Zastupničkom domu je protekle sedmice, naknadno u odnosu na provobitno predloženi tekst iz Federalne vlade, unesen i amandman da općinska odnosno gradska vijeća mogu putem Federalnog ministarstva trgovine zatražiti izuzeće od primjene odredbe o neradnoj nedjelji u njihovim sredinama ako za to postoji opravdan razlog. O eventualnim zahtjevima te vrste isključivo će odlučivati Vlada FBiH, precizirano je.

U Domu naroda nije podnesen nijedan amandman odnosno prijedlog za promjenu odredbi zakona.

Zakon o unutrašnjoj trgovini: Korak ka modernizaciji i usklađivanju oblasti trgovine



Povodom usvojenog Zakona o unutrašnjoj trgovini na Domu naroda Parlamenta FBiH, Udruženje poslodavaca FBiH izražava svoje zadovoljstvo načinom pripreme i usaglašavanja ovog Zakona kroz veoma intenzivan ekonomsko-socijalni dijalog koji je vođen u okviru uspostavljene Radne grupe, sastavljene od predstavnika vlasti, Sindikata radnika trgovine i uslužnih djelatnosti STBiH, reprezentativnog Udruženja poslodavaca FBiH i Udruženja potrošača. Usvojeni zakon odraz je usaglašenih interesa i kompromisa svih aktera na koje se zakon odnosi.

Iako je najviše interesa u javnosti izazvala odredba koja prodajne objekte nedjeljom proglašava zatvorenim, Udruženje poslodavaca FBiH ističe značaj i drugih odredbi Zakona koje se fokusiraju na modernizaciju i usklađivanje trgovinske oblasti s europskim i drugim standardima. Ovo uključuje precizno definiranje pojma trgovca i trgovačke djelatnosti, obaveze trgovaca, uvođenje savremenih klasifikacija i nomenklature, detaljno uređenje internet prodaje, te načine formiranja i isticanja maloprodajnih cijena, kao i regulaciju inspeksijskog nadzora i postupanje inspektora.

Kako bi se osigurala što bolja pripremljenost za primjenu Zakona, Udruženje poslodavaca FBiH najavilo je održavanje operativnog zajedničkog sastanka sa predstavnicima vlasti, prije stupanja na snagu Zakona, a sa ciljem usklađivanja s novim odredbama.

Zakon o unutrašnjoj trgovini prvi je u nizu zakona iz oblasti trgovine, a uskoro se pokreće zajednički rad i na Zakonu o e-trgovini, Zakonu o zaštiti potrošača i Zakonu o kontroli cijena.

Podrška UPFBiH općinama pogođenim nepogodama



Udruženje poslodavaca u Federaciji BiH izražava duboku zabrinutost zbog posljedica nastalih uslijed elementarnih nepogoda koje su pogodile općine Jablanica, Konjic, Kiseljak, Fojnica i Kreševo. Udruženje izražava duboko saosjećanje sa stanovništvom i stavlja se na raspolaganje lokalnim zajednicama i stanovništvu gdje i na koji god način se procijeni da je potrebno i da možemo doprijeti ublažavanju posljedica.

Udruženje poslodavaca u FBiH stavlja se na raspolaganje I Vladi FBiH, vlastima na lokalnom nivou da nas organizirano uključe tamo gdje smatraju da je najpotrebnije I da možemo dati svoj doprinos na sanaciji ovih strašnih posljedica.

Svjesni smo da su potrebe stanovništva u ovim područjima velike, te pozivamo sve naše članice da u okviru svojih mogućnosti pruže materijalnu, operativnu kao i podršku u ljudstvu i pomoć onima kojima je to najpotrebnije. Solidarnost i zajedništvo su ključni u ovim teškim trenucima, a svaka pomoć može napraviti vidljiv pomak i pružiti pomoć koja je očigledno potrebna stanovništvu. Svi smo dio ove zajednice i zajedno moramo i ovaj put prevazići izazove koji su pred nama. Udruženje poslodavaca u Federaciji BiH još jednom poziva sve članice da se uključe i doprinesu kako bi olakšali trenutnu situaciju i pružili podršku onima koji su najviše pogođeni. Uvjereni smo da, kroz zajedničke napore, možemo pomoći da se život u ovim općinama što prije vrati u normalu.

Naša misija je raditi zajedno za bolje sutra, a u ovim trenucima to je od posebne važnosti.

Udruženje poslodavaca u FBiH: Hitna potreba za obnovom transportne infrastrukture



Udruženje poslodavaca u FBiH, analizirajući stanje i posljedice nastale uslijed poplava i klizišta izazvanih vremenskim nepogodama, pored hitnog rješavanja stambenih i egzistencijalnih pitanja i obnove privrednih objekata i drugih kapaciteta poslodavaca u FBiH, ocjenjuje ključnim pitanjem za normalizaciju stanja i obnovu željezničke i drumske infrastrukture, posebno na području Općine Jablanica. Ovo je pitanje od kojeg podjednako zavisi i privreda i ukupno stanovništvo, a štete po privredu i gubici na dnevnoj osnovi su ogromni i mjere se milionima KM.

Pored stradanja imovine kompanija, privrednici su jako zabrinuti i zbog prekida linija snabdijevanja, a posebno u željezničkom saobraćaju. Udruženje poslodavaca u Federaciji Bosne i Hercegovine podržava ozbiljne napore Vlade FBiH i ohrabruje Vladu da stavi u funkciju sve raspoložive mehanizme kako bi ubrzali administrativno-pravna i finansijska pitanja primjene Zakona o javnim nabavkama koji je očigledno jedna od ključnih smetnji za brže rješavanje ovih pitanja.

Udruženje poslodavaca u Federaciji Bosne i Hercegovine poziva vlasti na federalnom ali i državnom nivou da iznađu modele za trenutnu ali i za buduće slične i interventne potrebe što je trenutnim propisima iz oblasti javnih nabavki značajno onemogućeno.

Održan sastanak sa privrednicima sa područja pogođenim poplavama



Na inicijativu Udruženja poslodavaca i samostalnih privrednika Konjic, direktor Udruženja poslodavaca u FBiH Mario Nenadić održao je 18. oktobra 2024. godine sastanak sa predsjednikom Udruženja poslodavaca i samostalnih privrednika Konjic Jasminom Badžakom, predsjednicom Udruženja privrednika Jablanica Alma Pinjić te članovima ovih udruženja, a sastanku su prisustvovali i predstavnici Štaba civilne zaštite Općine Jablanica i Pomozi.ba. Prethodno je direktor obišao kompanije zahvaćene štetama kao posljedica poplava sa područja Jablanice, Konjica, Fojnice i Kiseljaka.

Prilikom posjete privrednici su naglasili trenutne probleme sa kojima se suočavaju u sanaciji teških posljedica poplava te je zaključeno da će u uskoj saradnji sa Vladom FBiH tražiti najprihvatljivija rješenja za što skorije vraćanje u stanje od prije poplava. S tim u vezi naglašena su kao ključna sljedeća pitanja:

- Blagovremena i potpuna informiranost poslodavaca o aktivnostima nadležnih po predmetnim pitanjima kao i javnost evidencija o zatečenim štetama
- Dogovor oko sistemskog evidentiranja stanja šteta na privrednim objektima kroz rad vladinih komisija u čijem radu bi sudjelovali i predstavnici poslodavaca
- Blagovremeno uključivanje banaka i osiguravajućih društava na ubrzanom rješavanju posljedica i šteta prouzrokovanih poplavama
- Privođenje i osiguranje infrastrukturnih objekata do privrednih pogona i objekata (put, struja, voda...)

- Poslovne olakšice stradalim privrednicima kroz rješavanje pitanja prije svega plaća radnicima u stradalim kompanijama, utvrđivanje olakšica plaćanja doprinosa i poreza kroz odgovarajuću suspenziju posebno za privredna društva koja su potpuno obustavila rad
- Suspenzija - olakšice za plaćanje troškova vode i struje korištene isključivo za čišćenje fabrika i pogona a ne za potrebe redovne proizvodnje
- Suspenzija akontativnih plaćanja poreza na dobit stradalim kompanijama
- Podrška inspekcijskih i poreskih službi stradalim privrednicima u pogodenim općinama
- Insistiranje na tematskim sjednicama udruženja banaka i osiguravajućih društava s ciljem iznalaska najbržih i najpogodnijih rješenja za stradale privrednika
- (Pre)usmjeravanje i stavljanje u funkciju namjenskih fondova i sredstava (Fond za zaštitu okoliša, zavodi i službe za zapošljavanje i dr.)
- Angažman Oružanih snaga, Federalne uprave civilne zaštite i drugih raspoloživih kapaciteta za pomoć privrednicima u raščišćavanju i čišćenju i osposobljavanju kompanija za rad
- Iznalazak odgovarajućih rješenja za pomoć i podršku kompanija koje su u potpunosti obustavile rad
- Podrška poslodavcima - posebne mjere podrške radnicima s ciljem sprječavanja otkaza i odjava radnika posebno u situacijama produžene obustave i ponovnog početka rada kompanije

Na sastanku je također napomenuto da svi privredni subjekti koji žele dati podršku i pomoć privrednicima iz ugroženih područja, mogu istu realizovati putem Udruženja poslodavaca i samostalnih privrednika Konjic i Udruženja privrednika Jablanica.





Održan sastanak sa ministrom trgovine FBiH



Na inicijativu UPFBiH 09. oktobra 2024. godine održan je sastanak sa ministrom trgovine FBiH Amirom Hasičevćem i saradnicima, a ispred UPFBiH sastanku je prisustvovao direktor UPFBiH Mario Nenadić, član Upravnog odbora Nihad Imširović te članovi Stručne službe UPFBiH.

Tokom sastanka razgovaralo se o inicijativi za održavanje zajedničke konferencije o trgovini koja će se fokusirati na trenutne izazove i perspektive ovog sektora. Konferencija će se održati sredinom novembra, a očekuje se učešće predstavnika relevantnih institucija i organizacija vlasti, privrednih subjekata iz oblasti trgovine, potrošača, sindikata i ostalih.

Također je razgovarano o Zakonu o unutrašnjoj trgovini koji će se u formi prijedloga zakona razmatrati iduće sedmice na sjednici Zastupničkog doma PFBiH. Zakon predviđa funkcionalnija i modernija rješenja koja će u konačnici olakšati poslovanje u oblasti trgovine, a predstavnici UPFBiH, kroz radnu grupu za izradu zakona, izuzetno su doprinijeli izradi teksta zakona, posebno na njegovoj modernizaciji i potrebama privrede i izazovima tržišta. Prisutni su također razgovarali i o Zakonu o e-trgovini, Zakonu o zaštiti potrošača i izmjenama Zakona o kontroli cijena, ključnim zakonima kojima će se urediti oblast trgovine i smanjiti siva ekonomija. Predstavnici UPFBiH uključeni su u radna tijela za izrade pomenutih zakona te se očekuje da će uskoro biti pripremljeni prednacrti i upućeni u parlamentarnu proceduru.

Predstavnici UPFBiH i ministar Hasičević pohvalili su dobru međusobnu saradnju po pitanjima vezanih za trgovinu te najavili do kraja kalendarske godine značajan iskorak na uređenju pitanja trgovinskog sektora i oblasti trgovine generalno.

Primjena ZUT-a i Prva trgovinska konferencija teme sastanka ministra Hasičevića i poslodavaca



Usvojeni Prijedlog zakona o unutrašnjoj trgovini u Zastupničkom domu federalnog parlamenta i organizacija Prve konferencije o trgovini Udruženja poslodavaca u FBiH i Ministarstva trgovine FBiH bile su teme sastanka federalnog ministra trgovine Amira Hasičevića i predstavnika pomenutog udruženja.

Ministar Hasičević obrazložio je da usvojenim amandmanom Vlade FBiH koji nadopunjuje član 18. Zakona o unutrašnjoj trgovini predviđena mogućnost da općinska/gradska vijeća pošalju obrazloženi prijedlog izuzeća za trgovačke objekte od neradne nedjelje Federalnom ministarstvu trgovine, a FMT uputi Vladi FBiH na odlučivanje.

Ministar Hasičević podsjetio je da je ovim zakonom predviđeno i formiranje Savjeta za trgovinu kojeg će činiti predstavnici ministarstva, poslodavaca, sindikata, potrošača i eksperti čija zadaća će između ostalog biti i da razmotre zahtjeve lokalnih zajednica o izuzeću i daju svoje mišljenje koje će također biti proslijeđeno Vladi FBiH.

Razgovarano je i o primjeni Zakona o unutrašnjoj trgovini kako bi ona bila što bezbolnija i efikasnija za sve na koje se zakon odnosi.

Predstavnici Udruženja poslodavaca u FBiH poručili su da Prijedlog zakona o unutrašnjoj

trgovini uvodi rješenja koja značajno unaprjeđuju sektor trgovine.

Uključeni u radne grupe za izradu još nekoliko zakona i strategije iz ove oblasti, poslodavci su još jednom iskazali spremnost da daju svoj doprinos u pronalaženju najboljih rješenja.

Također su akcentirali da su redovna komunikacija javnog i privatnog sektora, kao i činjenica da su na inicijativu ministra Hasičevića, različite interesne grupe zajedno uključene u sve procese koje vodi Ministarstvo u oblasti unaprjeđenja trgovinskog sektora, već polučile dobre rezultate.

Dogovorena je i Prva konferencija o trgovini, planirana za 19.11. na kojoj će se napraviti presjek stanja trgovinskog sektora, detektovati problemi i izazovi sa kojima se suočavaju i trgovci i poslodavci, a također će biti definisan i najefikasniji način rješavanja izazova.

Rukovodstvo UPFBiH u posjeti kompanijama sa područja Goražda



Rukovodstvo Udruženja poslodavaca u FBiH, predsjednik Adnan Smailbegović i direktor Mario Nenadić, posjetili su 10. oktobra 2024. godine Goražde kojom prilikom su održali sastanak sa poslodavcima sa područja Goražda. Ovo je drugi sastanak u kratkom vremenu u Goraždu na kojem se razgovaralo o ključnim izazovima za poslovno okruženje te razmijenile informacije o budućim planiranim aktivnostima.



I dalje, prema ocjeni učesnika, ključni su problemi opterećenje cijene rada, nedostataka radne snage i zdravstveno osiguranje radnika u FBiH, ali i pitanja parafiskalnih opterećenja, školstva u kontekstu potreba tržišta rada, infrastrukture, europskih integracija u poslovanju i drugo.

Tokom posjete rukovodstvo UPFBiH obišlo je kompanije Unis Ginex d.d. Goražde, Pobjeda Technology d.d., Prevent d.o.o. Goražde i Prevent components kojom prilikom su se predstavnici Udruženja uvjerali i pozitivno iznenadili iskoracima i uspjesima u poslovanju spomenutih kompanija te su razmijenjene i informacije o unapređenju buduće saradnje

reprezentativnog Udruženja poslodavaca u FBiH i privrednih društava i obrtnika sa područja Goražda.

Održan sastanak sa ambasadorom Švicarske u BiH

Predsjednik i direktor Udruženja poslodavaca u Federaciji Bosne i Hercegovine Adnan Smailbegović i Mario Nenadić održali su 29. oktobra 2024. godine sastanak sa novoimenovanim ambasadorom Švicarske u BiH Gabrielom Derighettijem.

Predstavnici UPFBiH upoznali su ambasadora sa radom i organizacijom Udruženja, saradnji sa međunarodnim i drugim poslodavačkim organizacijama kao i ključnim prioritetima i izazovima sa kojima se poslodavci susreću. Ukazali su na problem nedostatka domaće radne snage te potrebu za liberalizacijom tržišta, odnosno iskorištavanje svih dostupnih kapaciteta u smislu zapošljavanja osoba sa invaliditetom, studenata, teško zapošljivih kategorija kao i olakšavanje procedura uvoza strane radne snage.

Također su skrenuli pažnju na previsoke fiskalne i parafiskalne namete koje opterećuju poslodavce i zbog kojih nisu u mogućnosti značajnije povećati plaće. Izvijestili su ambasadora da se dugo godina očekuju izmjene zakona koje bi uredili porezna davanja, ali da je još uvijek neizvjesno kada će se oni naći na sjednicama na razmatranju, a pogotovo kada će biti doneseni. Poslodavci su također ukazali na potrebu uspostave kvalitetnijeg ekonomsko-socijalnog dijaloga o ključnim pitanjima od interesa za poslovno okruženje.



Ambasador Derighetti je istakao da su radne migracije normalna pojava i da treba očekivati da će u budućnosti biti sve više kretanja radno sposobnog stanovništva, a samim tim i dolaska stranih radnika u BiH, te da se treba raditi na pojednostavljenju procedura za uvoz strane radne snage kako ne bi došlo do pada ekonomije.

Ambasador je napomenuo da Ambasada pruža podršku poslovnoj zajednici kao jednom od najzdravijih dijelova bh. društva te da će nastaviti saradnju na ključnim prioritetima od značaja za privredu.

Sastanak sa predstavnikom Službe za poslove sa strancima

Na inicijativu Udruženja poslodavaca u FBiH 02. oktobra 2024. godine održan je sastanak sa predstavnikom Službe za poslove sa strancima. Teme sastanka su bile konsultacije po pitanju izdavanja radnih dozvola stranim radnicima u BiH sa naglaskom na zloupotrebe ovih dozvola.

Predstavnik Službe upoznao je rukovodstvo UPFBiH o zloupotrebama radnih dozvola stranim radnicima koji se angažuju kod poslovnih subjekata u BiH. Razmijenjene su informacije o

načinu angažovanja stranih radnika koji se odvijaju direktnim ili putem posredovanja domaćih ili stranih agencija.

U dosadašnjem periodu, za angažman potrebne i profilirane radne snage direktan kontakt pokazao se sigurnijim putem da poslodavci osiguraju potrebnu radnu snagu.

Predstavnik Službe skrenuo je pažnju na potrebu uspostave boljeg sistema osiguranja provjerene radne snage kako bi se izbjegle nelegalne migracije i problemi po ovom osnovu.

Razgovaralo se također o sigurnijim i manje sigurnim i pouzdanim zemljama porijekla stranih radnika.



Služba za poslove sa strancima i druga nadležna tijela već su kreirali listu kredibilnih poslodavaca ali i onih koji u prethodnom periodu imaju loša iskustva sa provjerom i ispunjavanjem uslova rada i boravka stranaca u BiH kao i problema nelegalnog napuštanja poslodavaca nakon dolaska u BiH. U smislu trajanja i složenosti procedura, zajednička je ocjena da je trenutno najveći problem sa izdavanjem viza od strane Ministarstva vanjskih poslova BiH a ovaj problem posebno je izražen zbog nerazvijenih kapacitete diplomatsko-konzulatnih predstavništva BiH u zemljama iz kojih se radnici angažuju.

Tokom sastanka razgovaralo se i o pitanju angažmana stranih radnika na sezonskim poslovima u građevinsko industriji, poljoprivredi, uslugama, turizmu, ugostiteljstvu i drugo.

udruženje se zahvalilo Službi za poslove sa strancima na dobroj i redovnoj saradnji čime se pitanje angažmana stranih radnika u BiH kontinuirano unapređuje i rješava.

Odgovor Europske komisije u vezi zahtjeva za izuzeće profesionalnih vozača iz odredbi ograničenog boravka u zemljama Europske unije



Udruženje poslodavaca u FBiH obraćalo se više puta Delegaciji EU u BiH zahtjevima za izuzeće profesionalnih vozača iz odredbi ograničenog boravka u zemljama Europske unije.

Delegacija EU u BiH uputila je dopis koji objavljujemo u kurtoaznom prevodu:

Hvala vam na vašem nedavnom pismu u kojem se ističe vitalna uloga profesionalnih vozača u održavanju trgovinskih i transportnih odnosa između Zapadnog Balkana i EU. U potpunosti se slažemo da vozači u međunarodnom drumskom transportu pružaju nezamjenjivu uslugu koja ne samo da produbljuje ekonomske veze, već i omogućava međuljudske kontakte na više nivoa.

Pozivate na preispitivanje trenutne definicije kratkog boravka bez viza u šengenskom prostoru, koji je u sekundarnom zakonodavstvu EU propisan kao maksimalno 90 dana u bilo kojem periodu od 180 dana. Tvrdite da je ovo ograničenje previše ograničavajuće za profesionalne vozače sa Zapadnog Balkana.

Prvo, dozvolite mi da pojasnim da ovo ograničenje odražava nadležnosti EU da usvoji zajedničku politiku o kretanju osoba u šengenskom prostoru za kraći boravak, kako je navedeno u Konvenciji o implementaciji Šengenskog sporazuma (1). Svaki duži boravak, koji

prelazi 90 dana, u nadležnosti je država članica. Sa žaljenjem vas moram obavijestiti da nema planova za promjenu podjele nadležnosti između EU i država članica u tom pogledu niti za izmjenu definicije kratkog boravka u pravu Unije.

Stoga će nadležnost za boravak duži od 90 dana i dalje biti u državama članicama, koje su u mogućnosti da udovolje različitim potrebama i profilima kandidata putem nacionalnih viza za dugotrajan boravak ili boravišnih dozvola. Ovo rješenje također može biti adekvatno za profesionalne vozače, a mi pozivamo transportne kompanije da istraže takve opcije sa dotičnim državama članicama.

Ipak, svjesni smo da bi moglo doći do situacija u kojima bi vozači željeli ostati duže od 90 dana u šengenskom području, a da ne ostanu duže od kumulativnih 90 dana u bilo kojoj državi članici. Postoji pravna praznina koja se tiče takvih boravaka, koju je Komisija posljednji put pokušala riješiti 2014. godine kreiranjem specifične vrste vize. Ova ponuda nije dobila podršku država članica u Vijeću, što je dovelo do njenog povlačenja 2017. godine.

Za sada će se morati pronaći kombinovana rješenja, gdje će se pravila država članica o vizama za dugoročne boravke, radnim i boravišnim dozvolama morati potpuno istražiti, ukoliko profesionalni vozači sa Zapadnog Balkana žele ostati i raditi u EU izvan 90-dnevnog ograničenja Schengenskog *acquis*.

Kao što vam je već poznato, Sporazumi o stabilizaciji i pridruživanju zaključeni sa našim partnerima sa Zapadnog Balkana uključuju nekoliko odredbi koje olakšavaju drumski transport između Zapadnog Balkana i EU, uključujući neograničeni drumski tranzitni saobraćaj, recipročni pristup tržištu, poreze, putarine i druge naplate. Komisija je uvijek spremna razgovarati s našim partnerima kako najbolje iskoristiti ove odredbe. Osim toga, u kontekstu novog plana rasta za zapadni Balkan koji je postavila predsjednica von der Leyen 31. maja, spremni smo istražiti mogućnosti za bliže povezivanje Zapadnog Balkana sa jedinstvenim tržištem u nizu oblasti, uključujući transport.

Dopis možete pročitati [OVDJE](#).

Udruženje poslodavaca KS poziva Vladu i institucije vlasti KS da intenziviraju rad na usaglašenim inicijativama i zaključcima za poboljšanje poslovnog ambijenta



Udruženje poslodavaca Kantona Sarajevo održalo je sjednicu Upravnog odbora na kojoj je, između ostalog, razmatrana realizacija zaključaka sa ranije održanih sastanaka i dogovora postignutih sa Vladom i institucijama vlasti KS. Članovi

Upravnog odbora su iskazali nezadovoljstvo ostvarenim napretkom u realizaciji ključnih inicijativa i zaključaka sa zajedničkih sastanaka a koje je Udruženje iniciralo.

Ističemo da radne grupe formirane s ciljem poboljšanja poslovnog ambijenta u Kantonu Sarajevo nažalost nisu polučile rezultate, a posebno je to vidljivo u oblastima rada i zapošljavanja, komunalne privrede, parafiskalnih nameta, obrazovanja odnosno nedonošenje Zakona o dualnom obrazovanju. Posebno naglašavamo da smo imali niz inicijativa i projekata ali na kojim nije došlo do konkretnih aktivnosti ni koordinacije.

Unatoč kontinuiranim naporima i aktivnom učešću Udruženja poslodavaca KS u svim ovim i drugim inicijativama, izražavamo nezadovoljstvo zbog nedostatka napretka i realizacije dogovorenih ciljeva te pozivamo Vladu Kantona Sarajevo da intenzivira rad na ovim projektima od ključnog značaja za poslodavce i ekonomiju našeg kantona. Udruženje poslodavaca Kantona Sarajevo će i dalje aktivno pratiti i učestvovati u svim procesima koji su od interesa za privredu, te nastaviti pripremati i inicirati konkretne i konstruktivne prijedloge kako bismo zajednički unaprijedili poslovno okruženje u realnom sektoru u KS.

Nakon završenih lokalnih izbora, godišnjih odmora i drugih okolnosti koje su možda usporile napredak, Udruženje još jednom poziva Vladu KS da skupa iskoristimo vrijeme do kraja godine i određene planirane a nerealizirane aktivnosti stavimo u fokus zajedničkih aktivnosti i konkretizujemo do kraja godine. Također se poziva Vlada KS da se organizuje tematska sjednica na kojoj će se raspravljati o ključnim prioritetima za poboljšanje poslovnog ambijenta i rasterećenje privrede te da se urgentno počne sa rješavanjem nagomilanih problema sa kojima se poslodavci u Kantonu Sarajevo susreću.

Vlada KS i poslodavci o nedostatku radne snage i mogućim rješenjima



Predstavnici Vlade Kantona Sarajevo, Službe za zapošljavanje KS i Udruženja poslodavaca KS i FBiH, jučer su održali redovni pregledni sastanak iz oblasti rada i zapošljavanja, kao i pitanja privrednih aktivnosti, te priprema programa i projekata za naredni period, uz analizu tekućih i projekata koji su realizirani tokom ove godine.

Uz premjera KS Nihada Uka, ministra finansija Afana Kalamujića, ministra privrede Zlatka Mijatovića, ministricu za rad, socijalnu politiku, raseljena lica i izbjeglice Endu Pavić-Pečenković i ministricu za nauku, visoko obrazovanje i mlade Adnu Mesihović prisutna je bila i direktorica Službe za zapošljavanje KS Amina Džonlagić. Poslodavce su na sastanku zastupali predsjednik Upravnog odbora Udruženja poslodavaca KS Suhad Ećo i direktor Udruženja poslodavaca u Federaciji Bosne i Hercegovine Mario Nenadić te članovi UO UPKS, odnosno Muhamed Pilav, Salih Lemeš, Adnan Hodžić i Nihad Imširović te pravnica UPFBiH Jasmina Muratović.

U fokusu su bila pitanja nedostatka radne snage u Kantonu Sarajevo kao i realizacije programa rada i zapošljavanja a koja su poslodavci, putem UPFBiH, označili kao ključna, pored pitanja fiskalnog i parafiskalnog rasterećenja poslovanja.

Na sastanku su doneseni konkretni zaključci kojima se daje puna podrška usvajanju Zakona o posredovanju u zapošljavanju i socijalnoj sigurnosti nezaposlenih osoba koji će se razmatrati na sjednici Zastupničkog doma PFBiH naredne sedmice.



Ono što poslodavci, ali i vlasti u Kantonu Sarajevo očekuju od ovog federalnog propisa jeste konačan iskorak u razdvajanju evidencija nezaposlenih osoba i aktivnih tražitelja posla i podrške privrednicima u realnom sektoru pri zapošljavanju osoba sa evidencija nezaposlenih, ali i konačno uključivanje samih poslodavaca u strukture koje odlučuju o projektima zapošljavanja koji se finansiraju iz sredstava posebnih doprinosa namijenjenih za ove potrebe.

Dogovoreno je da se ubrzaju sve procedure implementacije kantonalnih propisa za realizaciju programa i projekata zapošljavanja.

Također je bitno se obavijesti javnost o preostalim sredstvima koja su na raspolaganju u Službi za zapošljavanje KS za potrebe zapošljavanja nezaposlenih, kao i da se pozovu sve kompanije i privredna društva obrtnici u KS da apliciraju za preostala sredstva, kako se ne bi dešavalo kao prethodnih godina da se dio neutrošenih sredstava u Kantonu vraća nadležnom Zavodu za zapošljavanje FBiH, nego da se iskoristi za zapošljavanje u Kantonu Sarajevo.

Posebna pažnja je posvećena unapređenju i usklađivanju sistema školstva sa potrebama tržišta rada.

Dogovorene su i zajedničke aktivnosti u vezi istraživanja zainteresiranosti nezaposlenih za određene poslove, kao i edukacije i prekvalifikacije, s ciljem njihovog zapošljavanja. Ovaj put, istraživanje bi uz podršku Vlade proveli predstavnici Udruženja poslodavaca KS.

U fokusu razgovora je bila i potreba unapređenja rada inspekcija kroz zaustavljanje sivog tržišta i rada na crno, koje predstavlja smetnju razvoju i nanosi štetu i privrednicima i vlastima, što će također biti tretirano kroz izmjene i dopune važećih zakona.

Razmatran je i niz drugih pitanja koja se odnose na projekte europskih integracija, digitalizacije procesa, kako u trgovini tako i u privredi generalno.

Najavljen je skori sastanak radi analize realizacije zaključaka kao i dogovora o novim koracima.

Rukovodstvo Udruženje poslodavaca FBiH u posjeti novootvorenom Porsche Sarajevo centru



U prostorijama kompanije Porsche BH 10. oktobra 2024. godine upriličen je sastanak delegacija uprave kompanije Porsche i Udruženja poslodavaca u Federaciji Bosne i Hercegovine. Prilikom posjete rukovodstva Udruženja, uprava kompanije Porsche BH prezentirala je novi poslovni objekat u Blažuju koji pod jednim krovom obuhvata sedam brendova Volkswagen grupacije. Također su predstavljene tehnološke inovacije održivog poslovanja koje su implementirane u novom Porsche Sarajevo centru.

Nakon obilaska impozantnog Porsche Sarajevo centra razgovaralo se o izazovima s kojima se poslodavci susreću ali i o mogućnostima buduće saradnje s ciljem unapređenja poslovnog ambijenta.

Rukovodstvo Udruženja poslodavaca u FBiH prezentiralo je aktivnosti i brojne ciljeve Udruženja s ciljem unapređenja poslovnog ambijenta, moguće modele predstavljanja interesa poslodavaca pri kreiranju budućih projekata. Također je rukovodstvo Porschea BH pozvano u formalno članstvo Udruženja čime bi se omogućila još direktnija saradnja između predstavnika Porsche BH i Udruženja ali i komunikacija sa članstvom Udruženja tj. privrednim subjektima u FBiH.

Direktor UPFBiH učestvovao na EESC Forumu o proširenju EU



Sljedeća Komisija mora biti Komisija za proširenje. Nije pitanje da li povećati ili ne, već kako to učiniti kako treba. To je bio fokus Foruma na visokom nivou o proširenju koji je održao Europski ekonomski i socijalni komitet (EESC) 24.10.2024. godine, a kojem je prisustvovao i direktor Udruženja poslodavaca u FBiH Mario Nenadić.

Više od 140 predstavnika civilnog društva iz zemalja kandidata za proširenje okupilo se po prvi put ikada. Glavna poenta učesnika bila je jasna: civilno društvo i socijalni partneri, koji se često zanemaruju u procesu pridruživanja, moraju dobiti centralnu ulogu u procesu proširenja EU.

Inicijativa za članstvo u kandidatima za proširenje (ECM), koja omogućava civilnom društvu u zemljama kandidatima da doprinese radu EESC-a, pokazuje kako aktivno učešće civilnog društva iz zemalja kandidata jača proces proširenja. Do sada su ECM dali doprinos u 12 mišljenja EESC o temama koje se odnose na proširenje, kao što su kohezivna politika EU, jedinstveno tržište, održivost poljoprivredno-prehrambenog sektora i nedostatak vještina.

"Ovdje se ne radi samo o proširenju EU-a – radi se o pripremi budućih država članica da aktivno sudjeluju u oblikovanju Unije, osiguravajući da su u potpunosti opremljene za suočavanje s izazovima koji su pred njima. Kroz saradnju sa civilnim društvom, udruženjima poslodavaca i sindikatima, stvaramo neophodnu osnovu za inkluzivniju i jaču Europu. Zajedno jačamo vrijednosti i demokratske principe koji će nas povezivati kao jedno, rješavajući zajedničke izazove i iskorištavajući zajedničke prilike" istakao je predsjednik EESC-a Oliver Röpke.

Za predstavnike poslodavaca iz FBiH bilo je više nego korisno upoznati se sa velikim iskorakom koji rade europski socijalni partneri na promociji socijalne inkluzije, smanjenju razlika, uvažavanju interesa svih grupa u rješavanju radno-pravnog i socijalnog zakonodavstva, razvoja institucionalnih kapaciteta i načinima na koji to radi moderna Europa.

Vrlo korisne prezentacije kroz održane panele dali su predstavnici kako zemalja članica, tako i zemalja koji su trenutno u pristupnim procesima, uvažavajući različite faze u kojima se neke zemlje nalaze.

Komitet posebno naglašava važnost da države preuzmu vodstvo u ekonomsko-socijalnom dijalogu i socijalnom partnerstvu. Za BiH je posebno važno upoznati se sa modelima liberalizacije tržišta rada i ulaskom na otvoreno tržište EU cijela Europa susreće se sa radnim migracijama, donose zakone o sezonskom radu, ulažu ogromne napore u strukovne škole prateći demografske izazove starenja stanovništva i druge promjene. Sloboda kretanja radnika je naglašena kao ključna za jačanje kapaciteta i ključ je u socijalnoj i tržišnoj konkurenciji zašto su neophodni snažni socijalni partneri na svim poljima od obrazovanja, rada, socijalne zaštite i drugo. Ključ je u konvergenciji i usklađivanju nacionalnih zakonodavstva zemalja pristupnica EU konvencijama, procesima i standardima uz ključno poštivanje digitalizacije i optimiziranja javne uprave, slobode kretanja radnika i drugo.

U kreiranje politika neophodno je uvijek uključiti udruženja civilnog društva, a posebno je naglašena važnost kolektivnog pregovaranja poslodavaca i radnika i institucionalne odnosno systemske podrške vlasti kroz kreiranje politika i procesa. Ratificiranje konvencija i reforme radnog zakonodavstva ključni su prioriteti i taj komitet očekuje da će novi saziv Europske komisije dodatno unaprijediti i naglasiti važnost tripartitnog socijalnog dijaloga pri tome jasno naglašavajući da će Europa sve zemlje u EU integracijama maksimalno pomoći ali isto tako da nikoga neće čekati da urade utvrđeni minimum ili više, to je uvjet uvjeta, a sve ostalo cijelit će se kroz iskorak koji rade pojedine zemlje aplikanti.

Tokom zasjedanje predstavljene su dobre prakse zemalja koje su prošle i upravo prolaze integracijske procese i pozvani su sei učesnici ovog foruma da prate najbolje prakse i da iste slijede. Također su predstavljene vrlo otvoreno i loše prakse. neki od učesnika naglasili su kako Europa trenutno ima ekonomsku ali još uvijek ne i socijalnu uniju. Velike su razlike među akterima članicama, odnosno pripadnicima ekonomsko-socijalnog dijaloga i svi učesnici Forumu su pozvani da što prije uspostave bolje ekonomsko-socijalne kvorume te da prate najbolje europske prakse što je dobar model za povlačenje raspoloživih europskih fondova i unapređenje nacionalnih politika svih zemalja proširenja.

Direktor UPFBiH prisustvovao svečanom otvorenju Generalnog BH sajma ZEPS 2024



Direktor Udruženja poslodavaca u Federaciji Bosne i Hercegovine prisustvovao je danas svečanom otvaranju 26. generalnog BH sajma ZEPS 2024, koji se održava do 05. oktobra na lokalitetu Kamberovića polje u Zenici. Zemlja partner ovogodišnje sajamske manifestacije je Republika Turska.

Sajam se održava od 1. do 5. oktobra na Kamberovića polju u Zenici, srcu Zeničko-dobojskog kantona, jednom od privredno najaktivnijih područja u regiji Zapadnog Balkana, naveli su organizatori Sajma. Ukupni sajamski prostor ove godine je 20.000 metara kvadratnih. ZEPS kao najveći sajam međunarodnog karaktera u Bosni i Hercegovini treću deceniju privlači značajan broj domaćih i kompanija, sa omjerom učešća 55 posto domaćih naspram 45 posto stranih izlagača, a ove godine je najavljeno 400 izlagača.

Do sada je sajam okupio više od 12.000 različitih izlagača, uz impresivnu posjećenost od blizu



1,5 miliona posjetitelja, čime je potvrđen njegov status jednog od ključnih privrednih događaja u Bosni i Hercegovini.

Republika Turska je zemlja partner ovogodišnjeg Generalnog BH sajma ZEPS 2024, a nacionalno učešće Turske organizuje Istanbulska privredna komora, druga po veličini i snazi privredna komora na svijetu, sa 800.000 kompanija članica.

Ambasador Turske u BiH Sadik Babur Girgin je izrazio zadovoljstvo što je ove godine zemlja partner sajma upravo Turska, kao i činjenicom da će upravo na ZEPS-u biti izložen prvi turski električni automobil TOGG.

"Turkiye i Bosna i Hercegovina su dvije bratske zemlje, što pokazuju i uzajamne posjete na najvišim nivoima", rekao je Girgin i podsjetio na Sporazum o slobodnoj trgovini između dvije zemlje, koji, kako je kazao, nudi pogodnosti Bosni i Hercegovini kakve Turkiye nije potpisala ni sa jednom zemljom u svijetu.

Nakon otvaranja, direktor Nenadić je obišao sajam i posjetio štand Udruženja privrednika Grada Zenica gdje je razgovarao sa predsjednikom tog Udruženja i članovima Upravnog odbora o jačanju saradnje i zajedničkim koracima i projektima za unapređenje poslovnog ambijenta. Također se razgovaralo i o pristupanju pomenutog udruženja Udruženju poslodavaca u FBiH.

Posjetu ovom važnom sajmu najavio je i predsjednik UPFBiH Adnan Smailbegović kao i mnogobrojne članice UPFBiH.

Nova članica UPFBiH - Porsche BH d.o.o.



Porsche BH d.o.o. je generalni zastupnik za brendove Volkswagen putnička i privredna vozila, Audi, SEAT, CUPRA, Škoda i Porsche, a posluje kao dio najvećeg europskog automobilskeg koncerna, Porsche Holding iz Salzburga.

Porsche BH dio je Porsche Holdinga, najveće automobilske maloprodajne kompanije u Europi. Osnovana u Salzburgu 1947. godine, započela je kao porodični biznis djece Ferdinanda Porschea, Louise Piëch i Ferryja Porschea, koji su prvenstveno krenuli s ambicijom da donesu revoluciju u automobilskej industriji. Međutim, ono što je započelo kao san, brzo je preraslo o globalnu priču o uspjehu.

Kroz decenije, Porsche Holding postao je jedan od najvažnijih igrača u automobilskej industriji. Proširio se na 28 zemalja, a kao savršen djelić te slagalice, uklopio se i njihov Porsche BH centar u Sarajevu, generalni zastupnik za brendove Volkswagen, Audi, SEAT, CUPRA, Škoda, Porsche i MOON, koji je nedavno otvorio vrata svog novog prodajno-servisnog objekta u Blažuju.

Novi Porsche Sarajevo centar, opremljen najnovijom tehnologijom, pod jednim krovom okuplja prodajne salone svih marki, servisnu radionicu, limariju i lakirnicu. Predstavlja najprestižniju trgovačku zgradu ove vrste u BiH, odražavajući posvećenost ovog velikog brenda inovacijama i izvrsnosti.

Više o kompaniji pročitajte [OVDJE](#).



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba